

ŠODDÂMPEIVI

Šoddâmpeeivi ohtâvuodâst puáhtá viettid rukkoospuudâ teikâ kevttiđ amnâstuv heviitmáin.

Rukkoospuudâ stivree pappâ, eres servikoddepargee teikâ servikoddálâš.

Vielgis lijnijn lovdum peevidi oolâ puáhtá pieijâđ meiddei riistâ teikâ krusifiiksi já cökkiittiđ kinttâl.

1. Salmâ

Saalmâ saajeest puáhtá leđe eres muusik.

2. Laidiittâs

Álgusivnádâs

Álgusivnádâs puáhtá lávlud teikâ luuhâđ.

P/O Eeji já + Alge já Pase Jiegâ noomân.

S Aamen.

P Mii išedeijee lii Hiärrá,

S sun, kote lii sivnedâm alme já eennâm.

TEIKÂ

P/O Hiärrá liävus tiigijn.

S Nuuvt še liävus sun tuu-uv jieggáin.

Laidiittâssäänih

Laidiittâssäänih ráhtojeh rijjáht.

3. Psalmâ

Puáhtá kevttiđ meiddei kirkkoive äigipuudâ miäldásijd teikâ eres psalmâid.

Psaalmâ saajeest puáhtá lávlud saalmâ.

Psaalmâ puáhtá lávlud teikâ luuhâđ. Ton aalgâst já loopâst puáhtá leđe antifoni.

Psaalmân labdoo Uccâ kunnee. Ton saajeest puáhtá kevttiđ salmâveerstâ: 60:8. Uccâ kunnee kuáđdoo meddâl västuääigi, 5. västuääigi pasepeeivi rääjist.

Immeel, muu váimu lii uaccáá,

muu mielâ lii rávhálâš.

Mun táátum lávluđ já suáittid!

Koccháá, váimum,

koccháá, harppu, ciilijd, lyyra,

mun táátum cuvnađ idedâsruádi!

Hiärrá, mun alestâm tuu almugij kooskâst,

mun láávlum puoh almugáid kijttosâd.

Tuu ármu uulât olmijd,

tuu oskolâšvuotâ pajas polváid.

Immeel, pajanus kunned paijeel olmij,

čuovvâdvuodâd paijeel puoh eennâm!

Ps. 57: 8–12

TEIKÂ

Immeel oovdâst muu mielâ josijduvá,

sun addel munjin iše.

Sun lii kállee, sun lii muu piäluštâs,

sun lii muu lanne, mun jiem juárbu.

Ps. 62: 2–3

TEIKÂ

Stuárráb ko eellim lii tuu ármu.

Muu poksâmeh alesteh tuu.

Imelâm, mun kiijtám tuu nuuvt kuhháá ko iälám,

mun turvâstâm tunjin, pajedâm kiettân tuu piälán.

Ps. 63: 4–5

TEIKÂ

Tun lah muu tuáivu, Hiärrá,

Hiärrá, muu torvo nuorâvuottân rääjist.

Šoddâmstân rääjist lah lamaš muu toorjâ,

ton rääjist ko kuáhtust muu luoštih.

Tunjin mun ain láávlum alestâs.

Ko tääl lam puáris já čuárgudâm,
ele hilgo muu, Immeel.

Mun kulluuttâm puáttee puolváid
kiedâd vyeimi já tavoidâd styeresuodâ.
Tastko olluvvuodáid olá vanhurskesvuodâd já stuárráh láá
tuu tavoh.

Immeel, kii lii tuu viärdásâš?

Ps. 71: 5–6, 18–19

TEIKÄ

Illood, eennâm! Pajediđ ávučuárvum Hiärán!
Palvâlid suu ilodin,
puáttid suu oovdân ávudin.

Tiettid, et Hiärrá lii Immeel.

Sun lii mii sivnedâm, já suu mij lep,
suu aalmug, suu kuáttum saavzah.

Ps. 100: 1–3

TEIKÄ

Onnáá peeivi lii Hiärrá ráhtám, ilodid já ávudid tast!
Hoosianna! Hiärrá, adde mijjân iššáád!
Oo Hiärrá, adde miänástus!

Ps. 118: 24–25

Uccâ kunnee

Kunnee Iäčán já Aalgan
já Pase Jiegân,
tego lâi aalgâst, tääl lii já ain,
avalâšvuodâst avalâšvuotân. Amen.

Antifoni kiärdoo

4. Ráámmátluuhâm

Lohhoo ohtâ teikâ mottoom čuávvuvâš ráámmátteevstâin. Puáhtá kevttiđ meiddei ráámmátteevstâid kirkkoive äigipuudâ mielđ teikâ eres ráámmátteevstâid.

Lohhee almoot ráámmátpitá.

Jes. 43: 1–3

Näávt iätä Hiärrá:

- Ele poolâ. Mun lam lonestâm tuu.

Mun lam tuu noomâ mielđ koččom,
tun lah muu.

Ko jodáh časij čoodâ, mun lam tuin,
ko virdij čoodâ, toh iä tuálvu tuu miäldásis,
ko lavkkiih tuulâ čoodâ, tun jieħ pyele
ige njuovčâtullâ tuu puáldi.

Mun, Hiärrá, lam Imelâđ.

Fil. 4: 6–7

Elleđ huolât masten, mut pyehtid ain tom, maid taarbâšvetted, ruhâđalmáin, ánumáin já kijttemáin Immeel tiätun. Talle Immeel ráávhu, mii lii puoh ibárdâs paajaabeln, varjâl váimuidâđ já jurduidâđ, nuuvt et pisovetted Kristusist Jeesusist.

Kol. 3: 15–17

Haldâšus váimuinâđ Kristus ráávhu, moos tij lepped oovtâ já siämmáá rummâš jesânin kuččum. Kolgâvetted meid lede kijttevááh. Adelid Kristus sääni aassâđ valjeht koskâvuodâstâđ. Máttááttid já ravvid kyeimi kuáimád puoh vijsesvuodáin já lávlud kijttevâš mieláin Imelân psalmâid, alestâssaalmâid já jieğâlâš lavluid. Maid porgâvetted-uv, sanijgijn teikâ tavoigijn, porgâđ puoh Hiärá Jeesus noomâst, kiiĵten suu peht Immeel, mii Eeĵi.

1. Tess. 5:16–24

Ilodid ain. Ruhâdâllâd joskâhannáá. Kijtted puohâst. Taam Immeel táttu tist, Kristus Jeesus oomijn. Elled časkâd Jiegâ, elled uccááš profetistem läähji. Keččâlâddâd puoh já tipted tom, mii lii pyeri. Pissood iärust puoh paast.

Jieš ráávhu Immeel pasottus tii ollásávt já varjâlus ubâ oromâd, tii jiegâ, siälu já rummâš, nuuvt et lepped vavettemeh mii Hiärá Jeesus Kristus puádidijn. Sun, kote tii koččo, lii oskolâš já ana lopádâsâs.

1. Joh. 4: 8–10

Immeel lii rähisvuotâ. Eidu tast Immeel rähisvuotâ almostui mii koskâvuotân, et sun vuolgâttij áinoo Algees maailmân, adelid mijjân eellim. Tast lii rähisvuotâ – ij tast, et mij lep rähistâm Immeel, mut tast, et sun lii rähistâm mii já vuolgâttâm Algees mii sudoi sovâtem tiet.

5. Vástádâs

Vástádâssân puáhtá leđe salmâ, psalmâ, laavlâ, čuojânâsmuusik.

Eenâb ko oovtâ teevstâ luvâdijn ráámmátluuhâm já vástádâs pyehtiv leđe vuáruttuvâi.

6. Saahâ

7. Salmâ

Saalmâ saajeest puáhtá leđe eres muusik.

8. Ruhâdâspuddâ

Vuárurukkoos

P/O Alestum lah tun, Hiärrá, mii Immeel!

S Tuu lii puoh, mii lii almeest já cennâm alne.

P/O Sivnedum liävus Hiärá nommâ tääl já ain.

S Škájus Hiärá noomâ alestâs!

Rukkoos

Rukkoos puáhtá ráhtid meiddei ríjjáht.

P/O Ruhádállup.

1. Puohváldálâš Immeel. Tun lah styeres ármustâd já muttuu-máttum oskolâšvuodâst já pisoh siämmáázin avalávt. Tuu mij alestep moonnâm iivijn, iiloost, sooroost já puoh pyerivuodâst, mon lah čáittám mijjân. Adde addâgâs paas tavoidân, rikkomušâidân já kuáridmijdân. Iššeed mii-uv adelid kyeimi kuáimásân váimustân addâgâs. Adde mijjân lyetittettee mielâ já puátteevuodâ tuáivu. Varjâl mii puoh vaarâin. Máttát mii vistig uuccâd tuu väldikode já vanhurskes táátu. Iššeed mii älgid já lopâttid jyehi piäiván Algaad Jeesus Kristus noomâst. Tuu kiirján láá mii peeivih čaallum. Ko majemuš-uv toin lii nuuhâm, väaldi mii lappuumáttum väldikoddásâd.
2. Rähis almalâš Eeči. Mij kijttep tuu ääigist, mon lah adelâm mijjân. Kijttep moonnâm iivijn já taan peeivist. Kijtto eellim laahjijn já huolâanneemstâd. Kijtto mučis já šiev peeivijn, kijtto meiddei vvestikeevâdijn já murrâšijn, moid lah čiehâm mieldioromâd já sivnádâsâd. Kijtto aldaas ulmuin, perrust já ustevijn. Oro miigijn jyehi peeivi. Ruokâsmit mii ain turvâstid tunjin já uuccâd vyeimi säänistâd. Immeel, mij kijttep tast, et Jeesusist Kristusist áarmu já rähisvuodâ käldee lii nuhâmáttum. Tipšo já virkosmit mii ármuinâd. Kuulâ mii Algaad noomâst.
3. Onne kijttep tuu, Immeel, NN:st já suu šoddâmpeeivist. Kijttep eellim adalduvâst, mon lah adelâm sunjin. Kijttep kaastâst, mast sun valdui Immeel pärnin já servikode

ohtâvuotân. Kijttep engâlijn, maid vuolgâttih suu máatkán laidid eellim maangâi puudâi čoodâ.

Kijtto, Eeči, ulmuin, kiäh puohtii sivnádâsâs NN pärnivuoatân já adeli torvo já tipšo. Kijtto nuorâvuodâ iivijn, moh puohtii hastuid já ustevijd. Kijtto tast, et vuorâsulmuu maangah pargoh já rähis ulmuuh láá adelâm siskáldâs elimân. Kijtto soro já luho peeivijn, eehid suoivuun já iideedpiäiváá kirkes suonjârijn. Onne mij ruhâdâllâp meiddei NN omâhái já ustevij peeleeest. Sivnáá já varjâl sii.

Almalâš Eeči. Tun váaldáh mii vuástá puoh vááijuvvuodâidângijn. Kristusist, Algestâd, mij lep ärmittum. Sust tun uáinááh mii räähisin já muččâdin. Adde mii suu aldavuodâst tubdâd tuottân rähisvuodâd já ilodid puoh peeivijn, moh láá vala ovdâstân.

S Aamen.

Mii Eeči

Hiärá rukkoos ciälkkoo oovtâ jienân.

S Mii Eeči, kote lah oolmijn.

Pasottum liävus tuu nommâ.

Puáduus tuu väldikodde.

Šados tuu táttu meid eennâm alne nuuvtko almeest.

Adde mijjân onnáá peeivi mii jyehipiäiválii leeibi.

Já adde mijjân mii suddoid addâgâs,
nuuvtko mij–uv addâgâs adelep toid,

kiäh láá mii vuástá rikkom.

Já ele jooheet mii kivsádâsân,
mut peesti mii paast.

Tastko tust lii väldikodde já vyeimi já kunnee nuvâhännáá.

Aamen.

9. Salmâ

10. Sivnádâs

P/O Sivnedus tii puohváldálâš já ármulâš Immeel,
Eeji já + Alge já Pase Jieggâ.

S Aamen.

TEIKÂ

P/O Hiärrá sivnedus tii já varjâlus tii.

Hiärrá čuovvâdus muáduidis tijjân
já liävus tijjân ármulâš.

Hiärrá jurgâlus muáduidis tii piälán
já adelus tijjân ráávhu.

Eeji já + Alge já Pase Jieggâ noomân.

S Aamen.

11. Loppâmuusik

Loppâmuusik puáhtá leđe salmâ, laavlâ já/teikâ čuojânâsmuusik.
Puáhtá kevttiđ ovdâmerkkân saalmâ 88: 2 - 4.